



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАР

2016 жылғы 10 қараша

Ұлттық Банкке 950-ден аса резюме келіп түсті

Қазақстан Ұлттық Банкінің Төрағасы Данияр Ақышев бүгін ҚРҰБ-да өтіп жатқан бейресми кездесу қатысушыларымен болашағы бар дарынды жас мамандарды іздестіру жөніндегі науқан туралы ақпаратпен бөлісті.



«Ұлттық Банктің дерекқорына 950-ден аса резюме енгізілді. Бізді бұл науқанға қаржы секторында белгілі бір тәжірибесі бар көптеген жастардың қатысқаны өте қуантады», – деді ол.

Оның айтуынша, қазіргі уақытта барлық резюме өңделіп, үміткерлер таңдаған бағыттары бойынша бөлінді. Үміткерлер келесі тестілеу және әңгімелесу кезеңінен өтеді. Тиісті іріктеуден өткен мақсатқа ұмтылған, жаңашыл және болашағынан үміт күттірер үміткерлер Ұлттық Банкке жұмысқа орналасатын болады.

Науқанның басталғаны туралы 2016 жылғы 20 қыркүйекте жарияланған болатын. Бұл науқан жастарды жұмысқа орналастырып, резерв қалыптастырып қана қоймай, әңгімелесу барысында олардың әлеуетін ашып, дамыту үшін мүмкіндіктерді іздестіруге бағытталған.

Келіп түскен барлық резюменің ішінде қатысушылардың басым бөлігін қазақстандық жоғары оқу орындарының түлектері құрайды. Сонымен бірге осы науқанға қатысушылардың ішінде Ұлыбритания, Австрия, Швейцария, Германия, Чехия, Малайзия, Ирландия, Оңтүстік Корея, Қытай, Жапония, Ресей сияқты елдерде білім алған шетелдік жоғары оқу орындарының түлектері, оның ішінде «Болашақ» бағдарламасының түлектері бар. Үміткерлер ішінде «PhD ғылым докторы», «ғылым кандидаты» ғылыми дәрежесі бар, білімді қатысушылар да бар.

Бұл науқанға қатысқан үміткерлердің шамамен 40%-ын қаржы секторында жұмыс тәжірибесі бар қатысушылар құрайды, үміткерлердің 36%-ы ағылшын тілін, 37%-ы – мемлекеттік тілді жетік біледі.

Қазақстан Ұлттық Банкі өзінің айналасында ашық ақпараттық аяны қалыптастырды

ҚР Ұлттық Банкі халықпен, журналистермен және қаржы нарығының кәсіби ойыншыларымен кері байланысты нығайтып отыр. Бұл жөнінде бүгін БАҚ-тың қатысуымен қаржы реттеушісінің бұрынғы басшыларымен өткен кездесуде ҚРҰБ Төрағасы Данияр Ақышев хабарлады.



Оның айтуынша, Ұлттық Банктің саясаты, біріншіден, айқын болды, ал екіншіден, прагматикалық саясатқа айналды. «Ол саяси міндеттерді орындауға емес, экономикалық міндеттерді – қаржы секторын тұрақтандыруға, инфляция деңгейін қолдауға бағытталған. Біздің жұмысымыз бірінші кезекте өз іс-әрекетімізді ақтауға емес, саясатымызды түсіндіруге бағытталған», – деді ол.

«Біз үшін ақша-кредит саясатын және қаржылық реттеуді жүзеге асырып отырған орган ретінде Ұлттық Банкке деген сенімді қалпына келтіру, сондай-ақ нарықтың қатысушыларын және халықты Ұлттық Банктің қабылдап жатқан шаралары туралы хабардар ету аса маңызды болып табылады», – деп атап өтті Д. Ақышев.

Ол реттеушінің журналистермен, сарапшылармен, халықпен, оның ішінде ел өңірлеріндегі белсенді ақпараттық-түсіндіру жұмысы арқылы сыртқы коммуникациялар қалыптастыру бойынша жүргізіліп жатқан жұмысы туралы еске салды. Мысалы, бүгін ҚРҰБ-да Ұлттық валюта – теңге күніне орай ҚРҰБ басшыларының галстуксыз эксклюзивтік кездесуі өтті, оның барысында кездесуге қатысушылар пайдаланушылардың, оның ішінде

БАҚ өкілдерінің реттеушінің жұмысы, ҚР қаржы нарығындағы ахуалы туралы және т.б. сұрақтарына жауап берді.

«Бүгін, осында менің достарым – ҚРҰБ-ның бұрынғы төрағалары біздің қаржы жүйеміздің бірлігін және жұртшылық алдындағы ашықтығын көрсету үшін жиналып отыр», – деп атап өтті Д. Ақышев.

«Бүкіл әлемдегі орталық банктің ашықтығы мен айқындығы ақша-кредит саясатын табысты жүргізу кепілдерінің бірі болып табылады. Бұл халықтың және нарықтың қатысушыларының жүргізіліп отырған саясатқа және жалпы алғанда Ұлттық Банкке және теңгеге деген сенімнің артуына әкеледі. Бүгін біз жұртшылықпен және нарықпен барынша тиімді жұмыс істеу үшін коммуникациялық байланыстарды қалпына келтіріп отырмыз, – деп қорытындылады Д. Ақышев. – Тұтастай алғанда, менің ойымша, мәселе Ұлттық Банктің саясаты қалай аталатынында емес, ең бастысы, ол халыққа және барлық қатысушыларға түсінікті болса болды».

Теңгедегі активтер Қазақстанда кеңінен тарауда

«Теңгеге және Ұлттық Банкке деген сенімнің қайтарылуы белгілі бір мерзімде аяқталуы мүмкін емес, осы бағытта біз тұрақты негізде жұмысты күшейтіп отырмыз», – бұл туралы ҚР Ұлттық Банк Төрағасы Данияр Ақышев қаржы реттеушісінің бұрынғы басшыларымен және БАҚ өкілдерімен кездесу кезінде мәлімдеді.

Оның айтуынша, биыл ҚРҰБ ақша-кредит саясатының операциялары бойынша жарияланатын ақпарат тізбесін біртіндеп кеңейте бастады. «Біз өзіміздің іс-әрекеттеріміз туралы тұрақты негізде хабарлаймыз және оларды жүргізу қажеттілігін түсіндіреміз. Бұдан басқа, базалық мөлшерлеме бойынша қабылданған шешімдерге түсініктер беру практикасы енгізілді. Сондай-ақ базалық мөлшерлеме бойынша шешім қабылдау процесіне тартылған Ұлттық Банк бөлімшелері басшыларының деңгейінде сараптамалық қоғамдастықпен қарым-қатынасты орната бастадық», – деп жалғастырды ҚРҰБ басшысы.

Ол сонымен қатар, Қазақстанның экономикасында теңгедегі активтерге және депозиттердің долларлануының төмендеуіне деген сенімнің қалпына келуінің жағымды үрдістері байқалып отырғандығын атап өтті. Атап айтқанда, теңгемен салымдардың үдемелі өсуі байқалып отыр, бұл халықтың және кәсіпорындардың валютаға басымдық беруі өзгергенін көрсетіп отыр. Мәселен, қыркүйектің қорытындысы бойынша шетел валютасындағы депозиттер үлесі 2016 жылғы қаңтардан бастап 70%-дан 58,3%-ға дейін, оның ішінде халықтікі 80%-дан 66,6%-ға дейін, заңды тұлғалардікі 62%-дан 52,5%-ға дейін төмендеді.

ҚР Ұлттық Банкі елдің қаржы секторының жандануын атап өтеді

Ұлттық Банк елдің қаржылық тұрақтылығын қамтамасыз ету бойынша жұмыс жүргізуді жалғастыруда. «Біз қаржы нарығын реттеудің қарсыциклдік сипатын ұстанып, банк секторының жағымсыз оқиғаларға орнықтылығын тұрақты түрде бағалаймыз», – деп хабарлады ҚР Ұлттық Банкінің Төрағасы Данияр Ақышев қаржы реттеушісінің бұрынғы басшыларымен және БАҚ өкілдерімен кездесу кезінде.

«Ұлттық Банк қаржы секторының субъектілерінің мүддесі теңгерімінің сақталуын ескере отырып маңызды проблемалық мәселелер бойынша қаржы секторымен ынтымақтастық жасайды, – деп атап өтті Д. Ақышев. – ҚР Ұлттық Банкі кез келген орталық банк және қаржы реттеушісі сияқты банктерге экономиканы салауатты, бәсекелес және өнімді кредиттеуді жүзеге асыруға мүмкіндік беретін тиісті реттеуші ортаны қамтамасыз етуге уәкілетті». Оның айтуынша, осындай кредиттеуді қамтамасыз етудің басты

талаптарының бірі төмен инфляция және банктер үшін қорландыру құнын төмендетуге мүмкіндік жасайтын, төмендетілген инфляциялық күтулер болып табылады.

Банктердің қаржылық жағдайының жақсы болуы, оның пікірінше, сондай-ақ өзіне депозиторлардың сенімін сақтау және кредиттеу арқылы қаржылық делдал функциясын орындау кезінде маңызды рөл атқарады.

Ол Ұлттық Банктің қаржы ұйымдарын және атап айтқанда банктерді қадағалау процесін жетілдіру жөніндегі іс-шаралар өткізетінін атап өтті. Мәселен, банктік заңнамаға аса маңызды түзетулер дайындау және енгізу арқылы дәрменсіз банктердің сауықтыру мен реттеудің қолданыстағы жүйесін жетілдіру жүргізілуде.

«Ағымдағы жылдың соңына дейін Мемлекет басшысының тапсырмасына сәйкес Ұлттық Банк ҚР Үкіметімен бірлесіп банк секторының жұмысын жақсарту және банктердің кредиттік белсенділігін қалпына келтіру жөнінде ұсыныстар енгізеді», – деп атап өтті Д. Ақышев.

Қазақстан Ұлттық Банкі ақша-кредит саясатын жүргізу кезінде оңтайлы теңгерім табады – Д. Ақышев



ҚР Ұлттық Банкінің Төрағасы Данияр Ақышев қаржы реттеушісінің бұрынғы басшыларымен және БАҚ өкілдерімен галстуксыз кездесу кезінде айтқанындай, «өзінің саясатын жүргізген кезде ҚРҰБ қаржылық тұрақтылықты, сондай-ақ баға тұрақтылығын қамтамасыз етуге мүмкіндік беретін оңтайлы теңгерім табуы қажет».

«Ұлттық Банктің негізгі міндеттері баға тұрақтылығын қамтамасыз ету және инфляцияны басқару болып табылады. Инфляция бойынша нысаналы көрсеткіштер ретінде 2016-2017 жылдарға 6-8% дәлізді, кейін ортамерзімді перспективада 2020 жылға қарай 4%-ға дейін төмендеуін белгілейміз», – деп еске салды Д. Ақышев.

Оның айтуынша, таргеттелетін деңгейге жету Ұлттық Банктің ақша-кредит саясаты саласында барлық қажетті күш салуымен, сондай-ақ негізсіз баға өсуіне жол бермеу бойынша Үкіметтің және жергілікті атқару органдарының белсенді жұмысының арқасында қамтамасыз етілетін болады.

Пайдаланушылардың еркін өзгермелі айырбастау бағамын енгізу инфляцияның жеделдетілуіне апарғаны туралы сауалдарына жауап бере отырып, Д. Ақышев: «Еркін өзгермелі айырбастау бағамын белгілеу инфляциялық таргеттеу режиміне өту шеңберіндегі амалсыз шара болды. Теңгенің икемді бағамы сыртқы ортаның өзгерістеріне дереу ден қоюға мүмкіндік береді, бұл экономикада теңгерімсіздіктердің

жинақталуына жол бермейді, сондай-ақ сауда балансын теңгерімдеуге және елдің алтынвалютта резервтерін сақтауға ықпал етеді». Нәтижесінде еліміздің валюта нарығындағы жағдай қалпына келді. Ұлттық Банк қыркүйекте және қазанда өзінің биржаға қатысуын нөлге апарды», – деп атап өтті. 2016 жылғы қазанда теңге бағамы 0,1%-ға бір АҚШ доллары үшін 335,46 теңгеден 335,12 теңгеге дейін нығайды «Теңгенің айырбастау бағамы тепе-тең жағдайда», – деп қорытындылады Д. Ақышев.

Базалық мөлшерлеме туралы мәселелерге қатысты «белгіленген кезінен бастап базалық мөлшерлеме үш рет 2016 жылғы ақпандағы 17%-дан қазанда 12,5%-ға дейін төмендетілді», – деді Д. Ақышев. Оның айтуынша, инфляциялық процестердің баяулауы мен жылдық инфляцияның тұрақты төмендеу үрдісі расталған кезде, сондай-ақ экономиканың сыртқы және ішкі секторларындағы тәуекелдердің төмендеуіне қарай базалық мөлшерлеме одан әрі төмендеуі мүмкін». Айта кететін жайт, ағымдағы жылғы 14 қарашада Қазақстан Ұлттық Банкі базалық мөлшерлеме бойынша кезекті шешімін жариялайды.

Қосымша ақпаратты мына телефон бойынша алуға болады:

+7 (727) 2704 585

e-mail: press@nationalbank.kz

www.nationalbank.kz